

LAPORAN PROGRAM HIDUP BERHEMAH DALAM MASYARAKAT

Program Hidup Berhemah dalam Masyarakat yang dianjurkan oleh Panitia Pendidikan Moral SMK Taman Desa ini diadakan pada 3 November 2009 di Dewan Terbuka Blok G, bermula pukul 10-15 pagi hingga 12.30 tengah hari.

Matlamat utama program ini dianjurkan adalah untuk memupuk nilai-nilai murni dan semangat hidup bermasyarakat dalam kalangan warga SMK Taman Desa. Melalui aktiviti seperti ini, pihak sekolah berharap agar pelajar-pelajar yang bersikap lebih prihatin dan penyayang dapat dilahirkan. Mereka ini diharapkan dapat memberikan bantuan atau pertolongan pada bila-bila masa kepada golongan yang memerlukannya, terutama golongan yang kurang bernasib baik dalam masyarakat.

Dalam program ini, tetamu seramai 113 orang telah diraikan. Mereka ini ialah golongan warga emas daripada Amitabha Centre (15 orang) dan Infant Jesus (15 orang), manakala golongan kanak-kanak istimewa pula daripada Pusat Kebajikan Kanak-kanak Istimewa INSAN (16 orang) dan guru serta murid-murid pendidikan khas dari SMK Desa Perdana (51 orang).

Acara dimulakan dengan ucapan alu-aluan daripada Tuan Pengetua, En. Gan Pheng Kheang, diikuti dengan ucapan perasmian oleh Dr. Tiew Chew Ming selaku AJK PIBG. Seterusnya, beberapa acara persembahan seperti persembahan Orkestra Cina, nyanyian koir, tarian India moden dan lain-lain dipersembahkan. Selesai acara persembahan, murid-murid diminta menyampaikan cenderamata dan sumbangan kepada tetamu bagi pihak sekolah. Sebelum pulang, tetamu dipersilakan ke kantin untuk makan tengah hari.

Walaupun julung-julung kali diadakan, program ini sedikit-sebanyak mampu mencapai matlamatnya. Pada hari tersebut, murid-murid nampaknya begitu bersungguh-sungguh dan ikhlas memberikan bantuan terutamanya kepada warga emas. Hal ini jelas melalui tindakan murid-murid membantu dan memimpin tangan mereka ketika turun dan menaiki bas, membawa mereka ke tandas dan menolak kerusi roda bagi yang uzur, memayungi mereka ketika ke kantin dan lain.

Diharapkan program ini dapat diteruskan pada tahun-tahun yang akan datang dengan lebih berkesan.

Laporan disediakan oleh Pn Junaidah Bt Abdullah